

AA.VV., *Framura un'antica terra ligure all'ombra della Torre di San martino – Percorsi storici, artistici e paesaggistici tra il mare e i monti*, Comune di Framura, s.d. (post 2014), pagg. 112

Dando 'na scòrsa a l'indice, se vedde che questa a l'é pròpio 'na goidda completa pe vixità e conosce Framua, in scià còsta che in pö ciù in là a l'é ciamà "Çinque Tære": se parla da céive de San Martin, scinbolo do pàize, e pöi do teritòio e da sò stòia, de l'arte e da devoçion, de tradiçion e do folklore, tutto ilustròu con tante bèlle fotografie a colori. Comme alegòu gh'é 'na mappa turistica disegnà con fantaxìa, con indicòu tutto quello che sèrve pe vixità questo comune ch'o no l'à in centro ciamòu Framua, ma çinque fraçioin ognidunn-a co-a sò gexa e a sò carateristica. Se gh'ariva co-a macchina, ma se un o peu caminà l'é bèllo arivaghe co-o treno e pöi giàsela a pè, comme 'na vòtta.



Nanni Basso (a cura di), *A memoia d'ommu – Le Albi-sole in immagini e parole*, Sagep Editori, Genova 2012, pagg. 8

Questa bèlla e interessante publicaçion a l'é stæta vosciua da-o Lions Club Alba Docilia pe conservà de memòie preçioze, racheugeite da-a viva voxe de personn-e de 'na çèrt'etæ; a-o libbro gh'é alegòu in dvd co-e interviste, ma inte questo caxo saiaè ciù giusto dî che o dvd o l'é acompagnòu da-o libbro.

Se parla, manco a dilo, de ceramisti, ma asci de pescoèi, de bancæ, de panetê, di volontai da Croxe Vèrde locale, de cristezanti, de zeughi e filastròcche: in gran bèllo travaggio, capaçe d'emozionà anche chi no l'é de Arbiseue.



Franco Bonatti (a cura di), *In ricordo di Tiziano Mannoni*, Accademia Lunigianese di Scienze "Giovanni Capellini", La Spezia 2016, pagg. 304

Olimpia Cecchi e Mauro Durante (a cura di), *Dalle Alpi Apuane ai monti della Lunigiana*, Accademia Lunigianese di Scienze "Giovanni Capellini", La Spezia 2016, pagg. 256

L'Accademia a l'é vegia comme a Compagna e a l'à sede a Spezza inte 'n bèllo palasso fæto apòsta pe lê do 1929; into scito [www.accademiacapellini.it](http://www.accademiacapellini.it) gh'é tutta a stòia. Sendo in sciò confin da Liguria, a s'interessa ben ben asci do teritòio d'in gîo e defæti i argomenti tratae inte questi doî libbri rigoardan ciù a Lunigiann-a e a Garfagnann-a. Però into primmo se parla de Brugnæ e de Ceparana e into secondo, ch'en i atti de 'n convegno de studi do 2012 in sce l'ambiente, se parla do Parco de Çinque Tære, e in ògni mòddo anche tutti i atri saggi en veramente interessanti.

